

ԴԱՆԻԵԼ ՎԱՐՈՒԺԱՆ
(Մենդյան 90-ամյակի առթիվ)

Բանասիր. գիտ. դոկտոր Ս. Ն. ՍԱՐԻՆՅԱՆ

Դարասկզբի արևմտահայ գրականության, այսպես կոչված, «արվեստագետ սերնդի» ականավոր բանաստեղծներից մեկը Դանիել Վարուժանն է, որի ստեղծագործության մեջ առավել ցայտուն արտահայտություն է գտել պոեզիայի նոր ուղղության գեղարվեստական հարստությունը։

Վարուժանը ծնվել է 1884 թ. Սերաստիայի գավառի Բրգնիկ գյուղում, նահապետական գյուղացու ընտանիքում։ «Դեռ հազիվ ես թիթեռնիկներ որսալու հասակին մեջ,— վերհիշում է Վարուժանը,— հայրս պանդխտած է Պոլիս, և մայրս ձմեռնային երկար երեկոները՝ թոնրատանը նստած՝ երեկայությունս օրորած է ենիչերին երու և գայլերու պատմություններով, երբ Մեյրեզումի հովը կույզար բուխարիկին մեջ մերթ ոռնալ և մերթ դեի ձագի մը նման լալ՝¹։ Նախնական կրթություն ստանալով տեղի ուսումնարանում, նա 1896 թ. տեղափոխվում է Պոլիս և ուսումը շարունակում հայկական վարժարաններում։ 1902 թ. մեկնում է Վենետիկ և ընդունվում Մխիթարյան միաբանության դպրոցը։ Այստեղ նա ձեռք է բերում համակողմանի գիտելիքներ, խորազնին ուսումնասիրում է հայ ժողովրդի պատմությունն ու հայոց գրականությունը, հետաքրքրություն հանդես բերում դեպի վերածնության շրջանի արվեստը, կարդում համաշխարհային գրականության դասականներին, մասնավորապես տարվում է և Տոլստոյի և Ժան Ժակ Ռուսսոյի գաղափարներով։ «Մուրատ-Ռափայելյանի մեջ է,— խոստովանում է Վարուժանը,— որ ճանշցած եմ հեղափոխության ոգին, կարդալով Ժ. Ժ. Ռուսոն, Թոլսթոն և այլք հազարումեկ դժվարությամբ»²։

1905 թ. Վարուժանը տեղափոխվում է Բրյուսել և ընդունվում Գանտի համալսարանը, ուր ուսանում է «քաղաքական ու ընկերական գիտություններ»։ Բելգիայում ապրած տարիներն ու համալսարանական ուսուցումը հսկայական նշանակություն են ունենում նրա աշխարհայացքի ընդլայնման, գաղափարական ու էսթետիկական ըմբռնումների ձևավորման գործում։ Նա մոտիկից դիտում է բուրժուական հասարակության ներքին հակասությունները, ականատես լինում բանվոր դասակարգի հեղափոխական ցույցերին, ոգեշնչվում քաղաքակիրթ աշխարհը համակած սոցիալական-ազատագրական պայքարի հովերով։

1908 թ. Վարուժանը վերադառնում է հայրենիք, զբաղվում մանկավարժական գործունեությամբ՝ գավառի և Պոլսի հայկական դպրոցներում, առաջատար դեր ստանձնում արևմտահայ գրական-հասարակական շարժման մեջ։

¹ Դ. Վարուժան, Նամականի, Երևան, 1965, էջ 157։

² Նույն տեղում, էջ 158։

Վրա է հասնում 1915 թ. Եղեռնը, և Վարուժանը, ի թիվս այլ մտավորականների, դաժանաբար սպանվում է, երբ բնդամենը Երեսունմեկ տարեկան էր:

Վարուժանի բանաստեղծությունների առաջին գիրքը՝ «Սարսուռներ» խորագրով, լույս տեսավ 1906 թ.: Սկսնակ բանաստեղծի խոհերը տակավին թա-



թախված են որոնումների ու ինքնահաստատման բաղձանքներով: «Մուսային» քերթվածում նա դիմում է Երգի աստծուն՝ իրեն շնորհելու Աբովյանի, Դուրյանի, Պեշիկթաշլյանի սրտահույզ ու կրակոտ քնարը, որպեսզի հասկանա ազգի ու մարդկության հոգսերը, զգա բնության, սիրո ու կարոտի գեղեցկությունը, իր «շրթունքները կապե ժողովրդի շրթունքին», «մոնչա դարհուրանքները կյանքի» և պատմի «վշտի աղեկեզ սարսուռները»: «Մոխիրներու առջև», «Վշտին», «Հիվանդ է», «Երազ և խոհ» քերթվածներում բանաստեղծը խորհրդածում է չարի և բարու մասին, կարեկցանք տածում թշվառներին, երկինք առաքում հարցահույզ կանչը, թե «Ե՛րբ պիտի դա մարդկության եղբայրության վսեմ օրը», կամ Ե՛րբ պիտի հուսաթափ լքյալը դռնի «տիեզերական օգնությունը»: «Սարսուռներում» Վարուժանի պոետական մտածողությունը

իր վրա տակավին կրում էր ոռմանտիկական վերացականության կնիքը: Աշխարհի կառուցվածքի, արդարության, չարի, բարու բմբռնումները ավելի շուտ վերացական գաղափարներ են, քան կյանքի իրական փորձից քաղված ընկալումներ:

Բանաստեղծությունների հաջորդ գրքում՝ «Ցեղին սիրտը» (1909), Վարուժանը հաղթահարում է այդ վերացականությունը և իր քնարը տրամադրում ժողովրդի ազատասիրական ձգտումների արտահայտությանը: Շարքը բացող «Ձոն» քերթվածը բանաստեղծական հավատամքի մի յուրօրինակ հիմն է առհալրենին, նրա փառքի, կարոտի, արյունոտ վերքի և խոցված սրտի երդն ու պայքարի մարտակոչը:

Ու պայֆա՛ւր, պայֆա՛ւր, պայֆա՛ւր երգեցի.

— Ձեզի բնծա՛ւ, հայ մարտիկներ—

Գրիչս ելավ անբռնց սրտերու հնոցի...

— Ձեզի բնծա՛ւ, ֆաջ մարտիկներ—

Եղեգնյա գրչով վրեժ երգեցի.

Բնդ եղեգան փող բո՛ց ելաներ:

Իր քերթվածներում Վարուժանը նկարագրում է արևմտահայ իրականության սարսափները, խորապես վերապրում մարած օջախների, հրկիզվող տը-

ների, մահվան ճիշերի և գիտության աղերսների դժոխային սարսուռները: 1895—1896 թթ. հայկական կոտորածի դեպքերն է նկարագրում «Ջարդը» քերթվածքը: Բանաստեղծը մոայլ տեսարաններ է ներկայացնում և ողբում հայրենի հովիտների ամայացումը.

Իսկ արտերուն, ա՛խ, արտերուն մեջ չֆնաղ՝
Ուր հայուն կլանեմ արև կ'ըմպե և արևն
Հոգիին մեջ կլւ մեռնի՝
Վաստակաբեկ դիակներով կը կանգնեն
Դողգոքանե՛ր, Դողգոքանե՛ր սրբազան,
Եվ բոլորն ալ, լի գա՛նգ մ'իւրենց ձեռքին մեջ՝
Միահամուտ կը խրմեն
Աւյուն ծերի և մանկան,
Աւյուն կնոջ, և արյունն
Աւառատին վրա խաշված Հիսուսին:

Վարուժանի բանաստեղծական տեսահորիզոնում համադրվում են էպիկական անցյալն ու ողբերգական ներկան, և փառավոր նախնիների մեծությունը նախատինք է բորբոքում անարժան հետնորդների թուլության հանդեպ («Անիի ավերակներուն մեջ»).

Ո՛վ ալպանք, ո՛վ նախատինք,
Ուրեմն ինչո՞ւ ապրիլ, ինչո՞ւ ընդունայն
Հայրենիքի անունն ասանկ մրորնչել,
Երբոր Ողջերը թրմրած
Քեզ չե՛ն ուզեր լրսել, ոստնուլ չե՛ն ուզեր,
Եվ ռազմերգեղ ահաբեկ՝
Ականջներին ծոցերնուն մեջը դողած
Երբ զրլիուղ շա՛նք կը մաղթեն,
Ուրեմն ինչա՞ւ, ինչո՞ւ ապրիլ...

էպիկականի ու ողբերգականի պատմական զուգահեռները այն միտումն ունեն, որպեսզի հաստատեն ազատության բարոյական հավատամքը: Ներկան ողբերգական է, բայց ապապան անհուսալի չէ: Բռնությունների ժամանակներն անցնում են, ոտքի են ելնում ժողովուրդները, ամենուրեք ազատության գաղափարի և կռվի երթով է արթնանում մարդկությունը: Ավերված փլատակների վրա հնդված արյան կաթիլներից կծլեն «վաղվան բողբոջները», և աշխարհը կմաքրվի դարերի տառապանքից: Ուրեմն պետք է մաքառել բռնության դեմ, պետք է ոչ թե ողբալ, այլ կամք ունենալ նահատակվելու, քանզի ազատությունը շնորհվում է ոչ թե աղոթքով, այլ նվաճվում է սրով ու պայքարով:

Ազատադրական պայքարի գաղափարը Վարուժանի պոետական հայեցության մեջ ելք է որոնում դեպի «հայկական ոգու» փիլիսոփայական հայտնությունը: Պատմական լայն տեսադաշտի վրա նա քննում է պատճառի ու հետեւանքի առեղծվածը և փորձում կռահել հայկական տոհմիկ ոգու սուրստանցիան: Ներկան հերոսական չէր. բայց նրա էթնիկական ձուլվածքը էպիկական

մեծություն ուներ, ուժի և զեղեցկության պաշտամունք, որով նա իր պատմությունն է տարեգրել մաքառումների ու նահատակության փառավոր դրվագներով: Ըստ Վարուժանի փիլիսոփայության պետք է նորոգել «հայկական ոգին», պետք է վերադարձնել նրան կամքի հզորության էթնիկական ձուլվածքը: Եվ այդ որոնումները բանաստեղծին տանում են դեպի հեթանոսական աստվածների ողորմողական մեծարանքը: Պատահական չէ, որ նա ազատագրական պայքարի իր քերթվածները տեղադրում է «Բագինի վրա» խորագրի տակ: Քրիստոնեական վանքերի հազարամյա աղոթքները ևրկնային հույսերով են սնուցել փրկության հավատը: Այդ աղոթքները սին պատրանք էին միայն, որ բթացրին կամքերը և խլացրին ազատասիրության բնազդը: Մինչև հիմա ժողովուրդն ունկնդրել է քրիստոնեական վանքերի առաքյալներին, պատգամախոս բանաստեղծը նրա հայացքն ուղղում է դեպի հեթանոսական աղոթավայրը և որպես մի նոր առաքյալ՝ խոսք բացում հին աստվածների հետ («Վահագն»), ունկնդրում հեթանոս Վերածնունդիների պատգամը՝ դյուցազուններ ծնելու, ուժի և ասպտամբության հրով նորոգելու մարդկանց կամքերը, հազարամյակների հեռավորությունից հրավեր կարգում հայրենիքի ոգուն («Հայրենիքի ոգին»):

Եկո՛ւր, եկո՛ւր.— եվ Մասիսի կատաբեհ
Դյուցազներու, վրկաներու հոգիներ,
Իբր աստղերու սերմնացան,
Տեղա՛ բոլոր իգայքյան մեջ մեր երկրին,
Մեր սրբտերուն խորունկ խորհերը հոսե
Արյունդ անբիծ...

Ազգային ոգու նորոգության կոնցեպցիան փիլիսոփայական ու էսթետիկական ընդհանրացում է գտել «Նեմեսիս» ասրում: Բանաստեղծը պատկերում է արվեստագետին, որը ձգտում է մարմնավորել իր ևրազը, ստեղծել այն խորհրդանիշը, որով վեհանում է արվեստագետի կոչումը և լուծվում ճշմարիտ արվեստի հավերժության գաղտնիքը: Այն օրից, երբ նա «ընկերացավ ժողովրդին արյան հետ», այլևս չէին հրապուրում գարնան ծաղկունքն ու կույսի ժպիտը: Այնտեղ, ուր «մեռնում է կյանքը», արվեստը պիտի որոնի «անմահ ևրազը»: Նա քանդակեց այդ ևրազը, և հսկա մի ժայռի վրա իր հեթանոս մերկությանմբ արձանացավ Նեմեսիսը՝ «Արդարության և վրեժի դիցուհին»: Սկզբում անհասկանալի ու աննկատ մնաց արվեստագետի սխրանքը, բայց երբ ժողովուրդը հասավ ինքնագիտակցության, նրա մեջ հանաչեց իր ևրկրպագության աստծուն.

Դո՛ւ մեզ Աստված, դո՛ւ Տիրամայր, դե՛հ իջիւ
Պատվանդանեղ և ձուլե մեզ կամփիդ մեջ.
Նվ օրենքներդ գրեհ
Մեր սակատին վրա արյան գրեերով:
Քու ժողովուրդդ մե՛նք եմք.
Պիտ՝ քսպանեմք մեր աստվածներն հին և նոր
Եվ անյունին վրա անունց՝
Ատտիկիեի մեհյանեղ ալ հոլակապ

Պիտ' քու մեհյանրդ կանգնենք:
 Պիտ' կործանենք ապարանքներ ու բանտեր՝
 Եվ փառանկյուն սալաբերովն իրենց հաղթ
 Պիտ քաղի՜նրդ կանգնենք:

1912 թ. Վարութանը հրատարակում է բանաստեղծությունների մի նոր շարք՝ «Հեթանոս երգեր» խորագրով: Այս նոր շարքում բանաստեղծը վերջավորում է հեթանոսության իր փիլիսոփայական ու էսթետիկական կոնցեպցիան: Եթե նախորդ քերթվածներում բանաստեղծը հեթանոսական կամքի մեծությունն էր փառաբանում, այդ միտումը հանգեցնելով ազգային-ազատագրական պայքարի զաղափարին, ապա «Հեթանոս երգերում» գտնում է այն մոտիվը, որն ուղեգծում է հայ բանաստեղծության համամարդկային հնչերանգը: «Ցեղին սիրտը» գրքից հետո Վարութանի գեղագիտական հայացքներում տեղի է ունենում որոշակի բեկում: Ակնարկելով, թե հայ գրականությունը մշտապես գերի է եղել ազգային հոգսերին և դրա պատճառը վերագրելով «հայուն ճակատագրին», Վարութանը գտնում էր, որ պետք է ստեղծել «հայկական արվեստ մը... համամարդկային զաղափարներու ուղ ու ծուծով» և «ընկերային հարցերի ազատական վերլուծությամբ»: Պետք է փարատել սարսափների մրդ-ձավանջը, պետք է հայկական հոգեբանությունն ազատել զենքի ու մահվան հավիտենական նախատինքից և ներարկել այն կյանքի բազմաճյուղ տարերքներով, սիրո, գեղեցկի, վայելքի զգացողությամբ, ուր հաղթանակում է ազատական ու ներուժակ մարդը: «Գեղարվեստը,— գրում է Վարութանն «Ազգայն» խմբագրությանը,— զենքերու դրվագումով կսկսի: Եվ այդ է միայն մեծ արվեստը. մինչև իր հաղթանակը (որ մարդ էակին հաղթանակն է նաև) այդպես պիտի ըլլա անիկա: Ստրուկ և հերոս հայ ժողովուրդը կրկեսեն դեռ նոր ելած, արյունոտ, քրտնաթոր և տապահեղձ, ամբողջ հոգևին ծարավ է. լույսի կուժը անհրաժեշտ է մոտեցնել իր շրթունքներուն: Կուժ մը, որ մաքուր և ազատաօդ աղբյուրներու մեջ միայն մխրձված ըլլա»³:

«Ապրված կյանքի» պոեզիան փիլիսոփայական իր լայն մեկնակետում պատռում է կեցության ազգային ներփակվածությունը և հայտաբերում արվեստի սուբստանցիայի համամարդկային սկիզբը: Միայն այս իմաստով պիտի ըմբռնել իր նամակներից մեկում Վարութանի արտահայտած, առաջին հայացքից տարակուսանք հարուցող տեսակետը, թե «...սիրահարական սեռը, միակն է գուցե, որ մյուսներեն ավելի ապրելու սահմանված է: Հայրենասիրական քերթվածները օր մը կուգա որ կմեռնին: Եթե սիրահարական քնարերգությունը մշակվի ճշմարիտ տաղանդի ուժով ու այդ քնարին լարերն թաթախված ըլլան ապրված կյանքի մը հույզերուն և մահացված սրտի մը արյունին մեջ, որ կապրի մարդ էակին հետ, դարերու մեջեն կբացատրե կինը՝ այդ մանրանկարը՝ տիեզերքի գեղեցկություններուն»⁴:

Այս տողերը Վարութանը գրել է այն օրերին, երբ արդեն ձեռնարկել էր «Հեթանոս երգեր» շարքի ստեղծմանը: Թեոդիկին դրած նույն այդ օրերի նա-

³ Նույն տեղում, էջ 168:

⁴ Նույն տեղում, էջ 172:

մականերից մեկում բանաստեղծը որոշակի է բացահայտում քերթվածների իր նոր շարքի զեղազիտական ու փիլիսոփայական կառուցվածքը. «Հիմա նոր հատոր մը պատրաստելու ձեռնարկած եմ, զուտ ապրված կյանքե, քիչ մը ավելի վերլուծող, ավելի խորիմաստ և հոգեբանական երդերով: Հայրենասիրական-ներուս խմորը ավյունովս և զուտ կրակով շաղված եմ. ան՝ ժողովրդին զանգվածին համար եղավ. massa-ին ուզեցի խոսիլ: Այս պատրաստելիք նոր հատորս կուզեմ որ հոգվույս մտերիմ հույզերը բացատրե. սրտի ծրարումը, ջիղերու կծկումը, ինձի իսկ անծանոթ տրտում փղձկումները, և այն կապարաթույր ձանձրույթը որ, սիրո ժամերուն մեջ, ժամանակը սպաննել ուզելով զայն ավելի կանուցանե, և այն հուսահատությունը որ իմ գոյությունս իսկ ստեպ ինձի ծաղրելի կդարձնե: Այս բոլոր հույզերը՝ զոր կերեակայեմ թե ամեն դյուրագագջ մարդ էակ ունեցած պիտի ըլլա, պիտի կազմեն մեկ կարևոր մասը այդ հատորին: Ա՛հ, ո՛րքան պիտի ուզեի Մարդ էակին գիրքը գրել... Հայրենիքը զմեզ մեր անձեն խիստ հեռացուցած է: Պետք է մեր սրտին նշխարները՝ որոնք երեք միլիոն ժողովրդին մեջ բաժնված են՝ հավաքել, կեդրոնացնել մեկ կուրծքի տակ, և զգալ իր սեփական կյանքը, զոնե նվազ ժամանակվան մը համար՝ ի սե՛ր Արվեստին, ի սե՛ր Կյանքի Երգին»⁵:

Տեղին չէր լինի վեճի առարկա դարձնել տրամաբանական այն բացառումները, որ առաջին հայացքից ի հայտ են բերում Վարուժանի ձևակերպումները ազգային-հայրենասիրականի և համամարդկայինի սահմանազծերում, կամ պոեզիայի ոլորտները եզրագծում բնական մարդու իմանենտ ապրումներով: Հականը հարցի զեղազիտական դրվածքն է, որ ըստ Վարուժանի հանգում է ոչ թե ազգայինին՝ նեղ իմաստով, այլ համամարդկայինին՝ փիլիսոփայական առումով: Սա զեղազիտական մի մտայնություն էր, որ պարտադրվում էր գրականության նորոգության անհրաժեշտությանը, որոնելով հայ գրականության համամարդկային մերձեցումների ուղին:

Այս իմաստով հեթանոսական ուղղության զեղազիտական շարժառիթների գիտական իմացությունը թերևս ավելի հիմնավոր բացատրություն է ենթադրում, քան հաճախ ներկայացվում է գրականագիտական հետազոտություններում: Բոլորովին ինքնատիպ չէ խնդրի այն հասարակացումը, թե հեթանոսական հոսանքը «ակնհայտ քաղաքական, ազատագրական բովանդակություն ունեւր» և որպէս այդպիսին «արեւմտահայ իրականության ծնունդ է» և «արեւմտահայ գրականությանը միայն բնորոշ երևույթ»⁶: Մինչդեռ փաստ է, որ հեթանոսական ուղղությունն իբրև փիլիսոփայական ու էսթետիկական հայեցություն ընդհանուր-համաշխարհային էր և լայն տարածում ունեւր եվրոպական գրականության ու փիլիսոփայության մեջ: Պերճախոս չէ՞ Դ. Վարուժանի մեկնությունը «Հեթանոս երգերի» գրության շարժառիթի վերաբերյալ. «Սակայն, տեսած էի Եվրոպան: Օգտվելով տեղւոյն հսկա գրադարանեն՝ կարդացել էի հնդիկներեն մինչև Հոմեր և Հոմերեն մինչև Մետերլինկ: Հոգիիս վրա բոցի մը լեզվին պէս զգացած էի բանվորներուն աղաղակները մեկ կողմեն, ու մյուս կողմեն շվայտ ու արբեցող կյանքը... բարոյիկ համարված փարթամ ընտանիքներուն: Իվ ահա ասոնք բոլորը՝ ստորագծած հիշողությանս մեջ և միացու-

⁵ Երևան, տեղում, էջ 173:

⁶ «Պատմա-բանասիրական հանդես», 1971, N 4, էջ 122—124:

ցած հին հունական ու հռոմեական կյանքին վերհիշումներուն, հանգեցա գրել... «Հեթանոս երգերը»⁷:

«Հեթանոս երգերի» տիպարանական համակարգը խարսխված է սիմվոլիզմի և նեոռոմանտիզմի էսթետիկական ու փիլիսոփայական ռմբոնումների վրա: Մերժելով նատուրալիզմի ու պոզիտիվիզմի սոցիալական դետերմինիզմը և ստեղծագործական շափանիշ՝ ընդունելով արվեստի բացարձակությունն ու բանաստեղծական երևակայությունը, Վարուժանն էապես արտահայտում էր դարաշրջանի մտավորականության ռեակցիան բուրժուական հումանիզմի ճշգնաժամի հանդեպ, կամքի մեծության, բնավորության ամբողջականության և հոգու գեղեցկության իդեալը հակադրելով քաղքենիական սահմանափակությանն ու բարոյական տրոհվածությանը: 1914 թ. հրատարակելով «Նավասարդ» տարեգիրքը, Վարուժանը բացում է այն «Նավասարդյան» քերթվածով, որն արտահայտում է «Հեթանոսական ուղղության» գեղագիտական դավանանքը.

Հաննա՛ւոյ Հայկյան, Նավասարդյան սա տոներուն
Առեափաո՛ւ

Ա՛լ վերածնն փլատակներեն, և փառագոչ
Զնարդ ա՛ռ:

Հանո՛ւն Ուլժին, հանո՛ւն Գեղին, մտիւ մեհյանն
Աստվածներուն.

Ձահր ձեռքիդ՝ բազնե բագին համասրփոե՛
Հուր և արյուն:

Եվ բարձրացուր Անահիտի ծիծերն ի վեր
Բաժակրդ նուռ,

Հետո գոհվող ֆերթողներուն սրտին վրա
Լեցո՛ւր, լեցո՛ւր:

Ձի մենք, հանուն Սերին, Սերմին, քու հին Ցեղիդ
Մարմարեն կույս,

Մե՛նք, Ձավակներդ օգոստափառ, պիտի կերտենք
Նո՛ւր Արշալույս:

Բարքերի հեթանոսական աղատությունը, որ տնօրինում էին հին աստվածները մերկությանմբ, կնոջ մարմնի ընծայաբերմամբ ու առնականությանմբ, բնության պաշտամունքի մաքրությանմբ էր ցողված և բարի էր, որովհետև գեղեցիկ էր: Քաղաքակրթությունը ծածկեց այն «բարոյականի շղարշով» և ինչ բնական էր, դարձրեց պայմանական, որպեսզի քողարկի անբարոյականությունը: Եվ որպեսզի բացի մարդու ներաշխարհի գեղեցկությունը, բանաստեղծը դիմում է հին, հեթանոսական աշխարհի մտապատկերներին: Այստեղ

7 Գ. Վ ա ռ ռ ժ ա ն, Նամականի, էջ 207:

ամեն ինչ ներդաշնակ ու զեղեցիկ է, որովհետև բնական է ու տարերային՝ Մարդիկ ձուլված էին բնությանը և բնության տարերքի պես ազատ ու աննախապաշար են նրանց ղգացմունքներն ու կրքերը։ Ուժի, զեղեցկության պաշտամունք կար, հոգու և մարմնի միասնությունը կերպ էր առնում մերկության մեջ և աստվածների հովանավորությամբ մարդիկ տոնախմբում էին, ըմպում գինի և վայելում կյանքը («Վանատուր», «Հեթանոսական», «Ո՛ր, Տալիթա», «Լերեկյան բաղանիք», «Սաղուռնական»)։

Հեթանոսական սյուժեի վրա հյուսված մի զեղեցիկ ստեղծագործություն է «Հարձը» ասք-պոեմը։ «Հայոց մեծամեծները» դարնանամուտն էին տոնախմբում Սյունյաց Բակուր իշխանի պալատում։ Ու մինչդեռ խրախճանքն արբենում էր գինով և կրքերն էին շիկանում վարձակների հեզանկուն մերկությամբ, Տրդատ իշխանը հմայվում է նազների զեղեցկությամբ ու նրա հայացքի մեջ որսում սիրո ներքին թրթիռը։ Եվ որովհետև աստվածներն են տնօրինել կամքի բնական ազատությունը, իսկ Բակուրը խանդոտ էր իր հարձի հանդեպ, ուստի Տրդատը վճռում է առևանգել նազնիկին։ Արժանապատիվ իշխանները հետապնդում են նրանց և նետի հարվածով սպանում զեղեցկուհուն։ Տրդատը հորդ արցունքներով լացում է իր կորսված սերը։ Կրքերի ողբերգական բախում է հուշում հեթանոսական այս ավանդույթը, բայց դարերի հեռավորությունից այն հնչում է զեղեցիկ ու բանաստեղծական, որովհետև ամեն բան մաքուր է այնտեղ, բնական ու տարերային, աստվածորեն տնօրինված և մարդկայնորեն ինքնակամ։ Այս կետում էլ Վարուժանը համադրում է ներկան անցյալի հետ, պոեմի էպիկական պատումը ընդմիջում ողմանտիկ զեղումներով, հեթանոսական կենցաղի պարզությունը հակադրում բուրժուական հասարակության վաճառվող բարոյականությունները։

Փա՛ռք մեծագուր կենցաղին ասպետական դարերուն՝
Ուր պաշտվեցավ Գեղեցիկն ու Զորությունը արբուն
Եվ խորհրդանիշը անմահ Գեղեցկին, Զորության՝
Փրփուրներու Դիցունին քստինքներով ուշնական։

Փա՛ռք ձեզի միշտ ավարներ, հավափումներ կիներու՝
Որոնք տրվին իրենց տարփն ու համբույրները աղու
Առյուծներու փառության, և ո՛չ ոսկի հորթերուն
Որոնց սիրտերն առավ լոկ սուրերու ծայրը փաղփուլն։
Փա՛ռք ձեզի միշտ, ո՛վ դաժնե ասպետական կենցաղին,
Ուր մարդիկ հզոր և անկեղծ էին նրման գինիին։
Առափինի փառության տեղ նենգն այս օր կը տիրե...

Հեթանոս աստվածների ողմանտիկական երազանքը հակաքրիստոնեական ընդվզումի է հանդում «Լեռնած աստվածներուն» քերթվածում։ Մեծարելով ուժի և զեղեցկության պաշտամունքի աստվածներին, բանաստեղծը ողբում է նրանց կործանումը և հեզում հոգով աղքատ, մտքով ստրուկ ներկա մարդկությանը, որ հին աստվածների շնորհներին օտարացած, երկրպագում է խաչին դամված մի անփառունակ աստծու։

Եվ ալժմ ալի խաչին տակ,
 Որուն քեւեր տրտմութիւն կը ծորեն
 Աշխարհիս վրա բովանդակ,
 Ես պարտւած, Արվեստիս դռնն սորտն
 Կ'ողբամ ձեր մահն, ո՛վ հեթանոս Աստվածներ:
 Տեսն'՛, բոլոր մեր անտառներն ու ծովեր,
 Աղբերակներն ու երդիկներ խաղաղ
 Ամայաքա՛նն ու տաղտկաքա՛նն: Ալժմ, ալա՛ղ,
 Խաղն էլ ինկած գաւջապարին տակ հրսկա
 Խուլ Աստուծո մը հրեա:

«Հեթանոս երգերը» հայ պոեզիայի ամենախնդրատիպ ու գեղեցիկ էջերից են: Այստեղ դրսևորվել է Վարուժանի գեղարվեստական մտածողության հարստությունը, վառ երևակայությունն ու ինտելեկտուալ հագեցվածությունը: Բանաստեղծական վառ ու տպավորիչ սյուսերների մեջ խայտում են մարդկային հոգու ուժեղ բռնկումները, կենդանագրվում հեթանոսական աշխարհի պեյզաժը՝ գույներն ու ձևերն պլաստիկ շարժումներով:

«Հեթանոս երգեր» գրքի մեկ բաժինն է կազմում «Գողգոթայի ծաղիկներ» շարքը: Այստեղ արդեն բանաստեղծի հայացքը հեթանոսական դարերի հեռավորությունից հետադարձ է կատարում դեպի ժամանակակից իրականությունը և պատմական ֆորմացիաների գուգահեռներում ի հայտ բերում մարդկության ողբերգությունը: Փոխվում է բանաստեղծության ներքին ու արտաքին կառուցվածքը: Գեղեցիկի, վեհի ռոմանտիկական գույները տեղի են տալիս մռայլ պատկերների անշուղ ծանրությանը, կյանքի բնական ներդաշնակությունը խզվում է սուր հակասությունների և գոյության տաղտուկի ամենօրյա սարսափներից: Եվ աշխատանքի ու ոսկու, տերերի ու ստրուկների, մահի ու արյան մաքառումների այս քառասյին աշխարհը բանաստեղծին ներկայանում է որպես մի «Նոր Գողգոթա»:

«Գողգոթայի ծաղիկներ» շարքը բացվում է «Աստուծո լացը» բանաստեղծությամբ, որն իբրև բնաբան կրում է Ռեյնանի խոսքերը. «Գեղեցիկ բաները արցուքի մեջ կըծնանին»: Աստված տիեզերական անգոյության մեջ իր տաղտուկը փարատելու համար փորձեց մի երկրորդ էություն ստեղծել, բայց այդ էության արձագանքը եղավ լուկ համր լռությունն ու կույր Ոչինչը: Հուսահատությունից լաց եղավ աստված և նրա արցունքներից գոյացան երկնքի աստղերը:

Եվ բանաստեղծին նրման Աստված ալ
 Որպես զի ստեղծե՛ հաւկ եղավ նախ լալ:

Այս բանաստեղծությունն արտահայտում է «Գողգոթայի ծաղիկներ» շարքի էսթետիկական ու գաղափարական միտումը: Ստեղծումի բերկրանքը ծընվում է տառապանքի լացից, ուրեմն մի խորհուրդ ունի նաև մարդկության «Նոր Գողգոթան», որի կսկիծներից երևի պիտի ծնվեն արշալույսի ծաղիկները:

Հաղթանակի գիշերն է այս տոնական.—
 Հա՛րս, եղ լեցուր նրբագին:

Պիտի դառնա կոիվեն տրդաս հաղթական.—
Հա՛ւս, քիբր ա՛ո պատուոյզին:

Սալլ մը կեցալ դրոան առջև, հորին Բով.—
Հա՛ւս, վառն՝ լույսը նրազին:

Տրդաս կու գա նակատն հրպարտ դափնիով.—
Հա՛ւս, բե՛ւ նրազը շեմին:

Բալց... սալլին վրա արդուն և սո՛ւզ բեռցեր են...
Հա՛ւս, նրազդ ասդի՛ն երկաբև:

Հերոս տրդաս հոն գարնվա՛ծ է սրտեն.—
Ա՛խ, հա՛ւս, նրազդ մարե՛...

Այսպիսին է հայրենական ցավը. հաղթանակի հույսը մարում է մահվան կսկիծով, բայց նահատակ հերոսի արյան կաթիլներից չէ՞, որ պիտի բուսնեն ազատության ծաղիկները: Գողգոթայի սարսուռներով է համակված ամբողջ մարդկությունը: Վարուժանի բանաստեղծական մտապատկերներում մռայլ գույներով է զծագրվում եվրոպական բաղաբը՝ սոցիալական իր ծանր հոգսերով: «Բանվորուհին», «Ընկեցիկը», «Մեռնող բանվորը», «Մեքենաները», «Դադար» քերթվածներում բանաստեղծը ցնցող գույներով պատկերում է ծխի ու մրի մեջ թաթախված բաղաբների դժոխային կյանքը, զրկված ու հացի կարոտ բանվորի տառապանքը, գործարանների հեղձուցիչ մթնոլորտն ու մեքենաների մաշող ժխորը: Խորհելով «տիեզերական անարդարությունը», երբ աշխատավորը հարստություն է ստեղծում, բայց մնում է զրկված, իսկ տերերն ու արքաները վայելում են նրանց վաստակը, բանաստեղծը մտովի դեգերում է դեպի անհունները՝ որոնելու «աղբյուրը լույսին»:

Բայց ապագան բանաստեղծին անհուսալի չի թվում: Աշխատավորների հոծ բանակների, նրանց ջլապինդ ձեռքերի մեջ մի ուժ է թաքնված, որից պիտի սարսափեն բռնության տերերը: Նա գուշակում է, որ «Մեր դարի հաղթության կամարն այսօր էլ կը հանգչի հարյուր հազար բանվորի ուսերուն վրա» և նրանց քայլվածքի հորձանքը պիտի փոքի «ղղյակների հիմունքները»:

Եվ կը տեսնե՞ս անոնց մեջ Քաղցին նիվադն հոգնահեռ՝
Ու փնահույզ կը սողա, կուշտին կը կրե կայծակներ.
Վաղն, ո՛վ Ընկեր, ո՛վ Ընկեր, Քաղցին վրա այս գոռոզ
Պիտի Ամպրոպը նայրի, վառն ջահեր բարբառոս:

Բանաստեղծը փառաբանում է մայիսի մեկը, հրավեր կարդում «տառապյալ հոգիներին»՝ իրենց Երթը միացնելու մարդկության հույսերի տոնին («Մայիսի մեկ»): Նոր դարն արդեն գուշակում է լուսավոր ապագան: «Մարդկության միտքն Ընկերավար կու գա բանալ վերջապես իմաստության րսփինքսին ապառաժե շրթունքներն» և ավետել գրոհի ու ըմբոստացումի երգը: Աշխարհը բռնկված է մի մեծ պայքարի հրով: Շարժվում է արևելքը, ազատության հրաբուխ է ժայթքում Եվրոպան, ռուսական մարդերուն վրա կորոտան հրավեր-

ները կռվին և խոստումներն երադին», ամենուրեք «կը խորտակեն շղթաներ»,
և այդ ահեղ ցնցումներին՝

Պիտի աշխարհը Ելլե նորագված ու գեղեցիկ
Եւ՛ յլիտ՝ րլլա արժանի Արեւին շուրջ դառնալուն...
Ո՛վ Դար, ո՛վ Դար հուսագեղ, դու Մարդկութիւն Առաւոտ...

«Հեթանոս երգերից» հետո Վարուժանը ստեղծեց գյուղական մոտիվների մի ամբողջ շարք, որը լույս տեսավ բանաստեղծի մահից հետո՝ «Հացին երգը» խորագրով։ Հետաքրքրությունը դեպի գյուղական իրականությունը չէր թելադրված ո՛չ ռոմանտիկական փախուստով և ո՛չ էլ հոգու խռովքը հովվերգական անդորրում փարատելու միտումով։ Ժողովրդի հավերժության փիլիսոփայությունը՝ ահա Վարուժանի գեղագիտական կոնցեպցիան։ Սա էլ պայմանավորել է բանաստեղծական պատկերի էպիկական կառույցը, իրականության ընկալման էսթետիկական սկզբունքը։ Այդ իրականությունը չի ցուցադրում ո՛չ սոցիալական ներքին հակասությունները և ո՛չ էլ կրքերի դրամատիկ բախումները։ Դա մի ամբողջական աշխարհ է՝ ժողովրդական կյանքի էպիկական տարերքով։ Թեալիստորեն բնական և ռոմանտիկորեն գեղեցկացված պատկերներում բանաստեղծը նկարագրում է գեղջկական կյանքի առօրյան, պոետականացնում աշխատանքն ու վաստակը, բերքն ու բարիքը։ Վարուժանը ի հայտ է բերում գյուղական պեյզաժի նուրբ և խոր զգացողություն։ Նա ստեղծում է հեքիաթային մի աշխարհ, ուր բնությունը գեղեցկությամբ է թարմացնում կյանքը, արևը ջերմացնում է սրտերը, լուսինը երազներ է օրորում և գեղջուկն ունկնդրելով բնության հրաշքին, ստեղծում է կյանքի հրաշքը՝ վար ու ցանքը, հունձն ու կալսը, հյուսում երգի ու աշխատանքի սիմֆոնիան։

Հովե՛ր կ'անցնին. —

Ու ցորյաններս հուշիկ հուշիկ կ'արթրննան
Իրենց խորհեն կը հոսի դադ մ'անսահման
Գեղադալար կողերն ի վար բրլուրին

Ծովե՛ր կ'անցնին։

Հովե՛ր կ'անցնին. —

Քիստերուն տակ կ'այեծրփին Եդիներ՝
Ու լուսնակն իր սափորին կաթն է հոսեր։
Կալերեն գյուղ, գյուղեն մինչև ադորին

Ծովե՛ր կ'անցնին։

Հովե՛ր կ'անցնին. —

Զրմբովստներով կը ծրվա դաշտը անհուն։
Ծիտը կ'երգե քառած հասկի մ'օրորուն՝
Մինչ իր տակեն ցարյաններու մոլեգին

Ծովե՛ր կ'անցնին.

Հովե՛ր կ'անցնին։

Բացվում է առաջին ծիլը, շաղում է գարնան անձրևը, պտղավորվում է արտը, և գեղջուկը երջանկությամբ է ցողում բնության շռայլ պարզեր: Արևը ոսկի է տեղում, ոսկի է ներկվում հասկը, հասած ցորենը օրորվում է հովի սոսափից և ավետում հունձբր: Գեղջուկը գերանդին է սրում, սայլերին բարձած խուրձը ժպտում է արեին, կալերում կամներգն է աշխուժանում և ցորենն է համբուրում արշալույսի շողը: Եվ երբ կյանքի այդ գեղեցիկ պոեմն է ավարտվում, բանաստեղծը օրհներգ է մաղթում աշխարհին՝ խաղաղության, բերրիության, ծիլ ու ծաղկի, առատության, բերկրության, պտղաբերումի և սիրնրգության մաղթանքը («Անդաստան»):

Արևելյան կողմն աշխարհի
Խաղաղությո՞ւն բող բլլա...
Ո՛չ արյուններ, քրտինձ հոսին
Լայն երակին մեջ ախսին.
Ու երբ հռնչե կոշնակն ամեն գյուղակի՝
Օրհներգությո՞ւն բող բլլա:

.
Հարավային կողմն աշխարհի
Պտղաբերում բող բլլա...
Ծաղկի՞ մեղրը փեթակներուն,
Հորդի գինին բաժակներուն.
Ու երբ թխեն հարսերը հացը բարի՝
Սիրերգությո՞ւն բող բլլա:

«Հացին երգը» շարքի գեղարվեստական առանձնահատկություններից մեկը ժողովրդական մոտիվների ոճական երանգավորումն է: Վարուժանն օգտագործել է աշխատանքի, սիրո ժողովրդական երգերի պարզ, անպաճույճ արտահայտչաձևերը, որոնք նրա քերթվածներին տալիս են ներքին հուզականություն և երաժշտականություն: Այս տեսակետից հատկապես ուշագրավ են «Առաջին ծիլեր», «Ցորյանի ծովեր», «Հասուն արտ», «Հունձք կը ժողվեմ», «Կամներգ», «Երևում» բանաստեղծությունները, որոնց ռիթմն ու պատկերային համակարգը կառուցված է ժողովրդական մոտիվների պոետիկական սկզբունքներով:

Հունձ՛ք կը ժողվեմ մանգաղով.
— Լուսնակը յարս է—
Ակոս ակոս ման գալով:
— Սիրածքս հարս է: .
Օրլխարաց եմ ու բոբիկ.
— Անո՛ւշ եմ հովեր—
Արտերուն մեջ քափառիկ:
— Մազե՛րն եմ ծովեր...

Վարուժանի ստեղծագործության մեջ արտացոլվել են դարասկզբի հայ քնարերգության գեղարվեստական որոնումները: Լինելով կրթված ու համակողմանիորեն զարգացած անհատականություն և խորապես տիրապետելով համաշխարհային պոեզիայի պատմությանը՝ հնադույն ժամանակներից մինչև

նորագույն շրջանը, նա ազգային քնարերգության ավանգների վրա պատվաստեց համաշխարհային պոեզիայի գեղարվեստական հարստությունը և կատարելագործեց հայ բանաստեղծության պոետիկական համակարգը: «Երկու միջավայր ազդած են վրաս,— գրել է Վարուժանը,— Վենետիկը իր Թիցիանով և Ֆլանտրը իր Վան-Տեգներով: Առաջինին գույները և վերջինին բարբարոս իրապաշտությունը հորինած են վրձինս՝ զոր սնափառությունն ունիմ թաթխած ըլլալու միմիայն հայրենի հողին որդան կարմիրին մեջ և ծովածուփ արյանը»⁸:

Վարուժանի արվեստը հատկանշվում է ոճական սկզբունքների մի բարդ համադրությամբ: Նա գիտական ստուգության ենթարկեց բանաստեղծության պոետիկական համակարգը, սահմանեց բառի ու հասկացության ճշգրտությունը, ձևի ներդաշնակությունն ու կառուցվածքի ամբողջականությունը: Վարուժանի բանաստեղծական մտածողությունը ելնում է սինկրետիկ արվեստի ըմբռնումից: Ընդունելով, որ «իրապաշտությունը գեղեցկության հասնելու ամենեն ուղիղ գիծն է» և զրական մյուս դպրոցները գիտելով որպես ռեալիզմի ուրույն դրսևորումներ, նա նախընտրում էր ոճական այն ունիվերսալիզմը, որն ընդունակ է արտահայտելու կյանքի անսահման կապերի բազմազանությունն ու հարստությունը: «Բնությունը,— գրում է նա,— իր խորհրդավորությունները ունի, իր անսանձ մրրիկները ունի, կամ իր միջօրեի արևուն միակտուր խաղաղությունը. ասոնք փոխնիփոխ նկարելով ինչպես որ են, ինչպես որ մեր հոգիին վրա փոխնիփոխ կցուլան, մենք փոխնիփոխ կըլլանք խորհրդապաշտ, ռոմանդիկ, դասական. հետևաբար գեղեցկությունը անթերի արտագրելու համար ես պիտի սիրեի տալ այս բոլորը միանգամայն, բնությունը ինչ-որ է և ինչպես որ է, մեկ բերվածի, մեկ տունի, նույնիսկ մեկ տողի մեջ, մերթ ըլլալով, միևնույն անգամ, դասական և խորհրդապաշտ, ռոմանդիկ և գաղափարապաշտ»⁹:

Այս բնորոշումն ավելի քան ճիշտ է բնութագրում Վարուժանի պոեզիայի գեղարվեստական կառուցվածքը: Նա հիրավի, ստեղծեց բանաստեղծական մի ինքնատիպ ու կատարյալ համակարգություն, համադրելով ռոմանտիզմի, դասականության և սիմվոլիզմի պոետիկական սկզբունքները:

ДАНИЕЛ ВАРУЖАН

(К 90-летию со дня рождения)

Доктор филол. наук С. Н. САРИНЯН

(Р е з ю м е)

Даниэл Варужан (1884—1915) — один из крупнейших представителей армянской лирики начала XX в. Философская направленность в его творчестве сочетается с эстетической и психологической глубиной в постижении и осмыслении мира. Он создал подлинно художественные ценности, составившие одну из самых блистательных страниц армянской поэзии. Поэтическое наследие Варужана состоит из четырех циклов: «Содрогания» (1906), «Сердце народа» (1909), «Языческие песни» (1912), «Песня хлеба» (1922).

⁸ Դ. Վարուժան, Նամակակի, էջ 158:

⁹ Նույն տեղում, էջ 177:

Отражая тяжелые страдания армянского народа, Варужан в то же время ввел в сферу своих поэтических раздумий судьбу всего человечества. Отвергая иррационализм буржуазного гуманизма, он находил идеал силы, красоты и свободлюбия в естественности и нетронутости народного быта и романтической экзотике нравов эпохи язычества, противопоставляя этот мир безнравственности и мещанской ограниченности «нового общества».

В творчестве Варужана со всей яркостью отразились художественные веяния поэзии начала XX в. Он приблизил армянскую лирику к художественным критериям мировой поэзии.